

四庫全書

集部

欽定四庫全書

宋元詩會卷三十八

兵部主事陳焯編

尤袤

字延之常州無錫人幼穎異蔣偕呼為奇童紹興十八年登進士第由泰興令召除將作監簿補大宗正丞遷祕書歷著作郎以論張說為所中出知台州有錄其東湖四詩進聞者上讀而賞歎遂以文字受知除淮東常平提舉改江東用吏部郎官召進密院兼諭德高宗崩前一日拜太常少卿自南渡來恤禮散失凡有討論悉付之袤酌古準今稱情合典遂以集事權禮侍同修國史兼權中舍光宗

即位每於經筵陳正始之道語侵權貴巧祠以歸
紹熙初召為給事中屢因陞賞踰格執奏上前多
所裁抑除禮部尚書卒年
七十謚文簡有集六十卷

梅二首

不奈雪埋照可堪風漏香
天寒無疹粟日暮有嚴妝
桃李羞浮艷松筠共老蒼
千山愁絕裏獨自占年芳

冷艷天然白寒香分外清
稍驚春色早又喚客愁生
待索巡簷笑嫌聞出塞聲
園林多少樹見爾眼偏明

蠟梅

破臘驚春意凌寒試曉妝應嫌脂粉白故染麴塵黃綴
樹蜂縣室排筍雁著行團酥與凝蠟難學是生香

雪

睡覺不知雪但驚牕戶明飛花厚一尺和月照三更草
木淺深白丘塍高下平饑民莫咨怨第一念邊兵

落梅

清溪西畔小橋東落月紛紛水映紅五夜客愁花片裏
一年春事角聲中歌殘玉樹人何在舞破香衫曲未終

卻憶孤山醉歸路馬蹄殘雪襯東風

甲午春前得雪二首

寒聲昨夜響蕭蕭逗曉堦庭亦已消殘臘距春無幾日
一年飛雪只今朝微陽欲動梅驚夢餘潤纔沾麥放苗
天意未能違物意漫留殘白占山腰

飛英回旋逐風飄爽氣令人意欲消往苒流年春送臘
殷勤密雪暮連朝冬回庾嶺花無數煙暖藍田玉有苗
一飽自今真可望更看南畝麥齊腰

海棠盛開

兩株芳蘂傍池陰一笑嫣然抵萬金
火齊照林光灼灼彤霞射水影沈沈
曉妝無力胭脂重春醉方酣酒暈深
定自格高難著句不應工部總無心

送晦菴南歸

二年摩手撫瘡痍恩與廬山五老齊
合侍玉皇香案側卻持華節大江西
鼎新白鹿諸生學築就長虹百尺堤
待哺饑民偏戀德老翁猶作小兒啼

送吳待制帥襄陽

方持紫橐侍西清，忽領雄藩向暑行。
誰謂風流貴公子，甘為辛苦一書生。
詞源筆下三千牘，武庫胸中十萬兵。
從此君王寬北顧，山南東道得長城。

周必大

字子充，其先鄭州人。以祖宦廬陵，遂家焉。紹興二十年進士，試館職。高宗讀其策，曰：「掌制手也。」由秘書省正字除監察御史。孝宗踐祚，遷起居郎。上曰：「朕舊見卿文，當以近作進覽。」尋權中舍侍經筵，兼權給事中，封駁不避貴倖，請祠去。久之，提刑福建，召除秘書少領史職，草國書使，金稱上意曰：「此大才也。」

尋權兵禮二侍兼直學同修國史以論張說出知
建寧府至豐城稱疾而歸三請祠其名益重久之
起兵侍再兼直學拜叅知政事俄知密院淳熙十
四年拜右丞相明年遷左丞許國公光宗即位拜
少保益國公慶元初三上表引年遂以少傅致仕
薨年七十有九謚文忠自號平園老叟集二百卷
著書八十一種曹能始計
其詩未脫詞科習氣信然

己丑二月七日雨中讀漢元帝紀效樂天體

昭君顏如花萬里度雞鹿古今罪畫手妍醜亂羣目誰
知漢天子祛服自列屋有如公主親尚許穹廬辱況乃
嬪嬙微未得當獯鬻奈何美文士太息爭度曲生傳琵琶

琵琶聲死對青塚哭向令老後宮安得載簡牘一時抱微
恨千古留賸馥因嗟當時事賢佞手反覆守道蕭傳死
效忠京房戮史臣一張紙此外誰復錄有琴何人操有
塚何人宿重色不重德聊以砭世俗

陶淵明有已酉重九詩一首某以此年此日舟次

吉水距永和才一程耳輒用其韻先寄諸兄弟
王觀十五載歸來稀舊交我鬢昔已華今茲固宜凋去
國甫重五還家條登高永和有兄弟咫尺如煙霄緬懷

江東使地遠心更勞遙知上翠微江山勝金焦豈無茱
萸酒望望心鬱陶相從會有日永矣非一朝

十月十七日大椿堂小集胡從周季懷以予目疾
皆許送白酒彌旬不至戲成長韻

畏疾甚畏威目昏口止酒爾來時一中免使論薄厚儀
康久廢祠釀具散莫糾採藥山已焚種秫時轉後門稀
問字客室乏借書年尚賴金石交每顧貧病叟前時相
娛樂如對疏廣受有漿不待乞似驗歲在酉今日掃風

軒明日毛園敕白衣雨不來往往化烏有頗聞繼高會
霑醉牛馬走寧忘伐木詩酤胥客朋友或疑夾西江恥
復餉升斗胡不玩易象樽簋納吾牖二義倘未然諾責
何為負君兮優阮籍僕也減充守結交十五年果可不
飲否食言能無肥有孚乃免咎速宜倒糟牀走送昔與
醪勿學比舍郎夜半招吏部

楊廷秀送牛尾狸侑以長句次韻

江南十月方肅霜小槽初滴鵝兒黃頗思指動異味嘗

門正張羅誰末將披綿強來推不去枯鰕欲進上之戶
羊羶豕腥猶可厭肪截脂凝在何處草玄子雲黃門郎
遺我黑面質白章形之硬語努力強寫以奇字伴史倉
愧無纖手色傾國壓糟磨刀走臧獲喜于左手持蟹黃
美勝八珍熟熊白古來狸首歌侯門名以牛後真屈君
從今玉汝洗俗諺好與紈袖陪梁苑公詩如貂不頻削
我續狗尾句空著

沈作式署園

宮槐分影直官柳著行疎畫棟飛輦遠晴霞散綺餘池
邀山簡馬水勝武昌魚只恐封泥召驂鸞上帝居

次韻芮曹國憶去年上元

門外人隨月窗前竹動風老便佳節靜病幸綠樽空春
至鴻聲北人遙蝶夢東隔年詩有債生理固知窮

元宵煮浮圓子前輩似未曾賦此坐間成四韻

今夕是何夕團圓事事同湯官尋舊味竈婢詫新功星
燦烏雲裏珠浮濁水中歲時編雜詠附此說家風

丁維皋園中牡丹未開

拙速那能鬪巧遲從教綠暗與紅稀
天香未染蜂猶懶日幄先籠蝶已飛
羯鼓只應催上苑鶴林誰復倩紅衣
請君多釀淮南米縱賞先拚倒載歸

東廣東芮漕時聞其部中寇退

笑酌貪泉為賦詩凜然清節照南陲
廐空不納如羊馬才大常嗤捕鼠狸
盜已犇秦非地險心遲去魯只天知
愛君勤把歸鞍促莫待鸞旗訪具茨

戴子微運使出湖北

早日逍遙侍從間，重來奉引近天顏。
倦趨北闕晨霜冷，思上南樓夜月閒。
直指不誇新衣繡，曲臺猶記舊聯班。
豈知隔面心仍渴，空訝相如下筆慳。

上已訪楊廷秀賞牡丹于御書齋其東園僅一畝
為術者九名曰三三徑云

楊監全勝賀監家，賜湖爭比賜書華。
回環自斷三三徑，頃刻常開七七花。
門外有田供伏臘，望中無處不烟霞。

卻慚下客非摩詰無畫無詩只謾誇

彭孝求以綠野行送芍藥數種鄙句為謝

占斷春光及夏初瑠璃剪葉朶珊瑚休論花品同而異
為詠詩人樂且訏北第莫辭金鑿落南禪爭看玉盤盂
彭宣微恙何妨醉自有嬌癡婢子扶

次韻廷秀待制玉藥

姑射山前雪照人長安冰畔態尤真步搖翹玉中心碎
瓔珞塗金四面勻常笑酴醾藏浪藥應陪芍藥殿餘春

自從唐代來天女直到平園見後陳

送韓道希亞卿移漕江中

饋餉隨蕭不作難秦淮金峴漢時關天開虎踞龍盤處
地近雞翹豹尾間洗印先經三峽寺觀風徧踏九華山
盡收奇秀歸詩稿却起賡歌供奉班

次韻章茂獻謝茶

墨淡名高筆有花胸中五色補皇家諫書夜奏常焚藁
講舌時乾每賜茶秘祝重尋丹竈火長生元笑紫河車

新詩有味知何似
雙井春來試白芽

送鄧曹根移帥揚州

聞道維揚地望雄
風流人物似江東
六龍前日臨淮海
五馬由來說醉翁
碧月幾橋留夜色
珠簾十里待春風
遙知九日平山會
笑插茱萸滿鬢紅

次韻王少府送蕉坑茶

昏然午枕困漳濱
醒以清風賴子真
初似參禪逢硬語
久如味諫得端人
王程不趁清明宴
野老先分浩蕩春

敢向柘羅評綠玉待君同碾試飛塵

曾英發運幹攜二詩相過復惠漢唐金石刻次韻

道謝

君家奕葉播芳馨室有圖書暴兩榮詩什編成風雅頌
寶章臨徧草真行興來文陣千軍掃醉後談鋒一坐傾
已許春風來過我從今日日聽嚴程

遊廬山弔大林

上盡諸峰地轉平天低雲近日多陰古來南北通雙徑

此去東西啓二林
虞世南碑從泯沒
白居易序合推尋
匡廬第一神仙境
忍使如今漸陸沈

胡邦衡生日以詩送北苑八銖日注二瓶

賀客稱觴滿冠霞

樓名

縣知酒渴正思茶
尚書八餅分閩

焙主簿雙瓶揀越芽
妙手合調金鼎鉉
清風穩到玉皇家
明年勅使宣臺餽
莫忘幽人賦葉嘉

前歲冬至與胡邦衡小語
端誠殿道直下舊事
今年邦衡舉易緯六日七分之說
輒用子美五更

三點為對因憶去年館中團拜十人今作八處
感歎成詩

青城小語慶新陽共向紅雲拜玉皇六日七分驚歲月
五更三點憶班行屬車誰從黃麾仗釣艇還飛白羽觴
猶勝去年同館客十人八處更相望

魚兒牡丹得之湘中花紅而蕊白狀類雙魚葉與
牡丹無異亦以二月開因是得名其幹則芍藥
也

天教姚魏主芳菲
合有宮嬪次列妃
玉頸圓瑳宜粉面
霞裙深染學顰衣
枝頭窈窕魚雙貫
風裏蹁跹鳳對飛
莫把根苗方芍藥
畱春不似送將歸

酬楊廷秀待制

十年不侍殿東頭
臨水登山隱者流
一眼瞳方無異相
三層句曲有巍樓
幸殊王粲非吾土
何事龐公不入州
至後臘前天欲雪
扁舟乘興肯來不

望皖公山

太婆嶺獨高秋浦皖公山正望龍舒端如牛女隔天漢
不似彭郎近小姑

范成大

字致能吳郡人紹興二十四年進士授戶曹監和
劑局擢著作佐郎吏部員外被論奉祠起知處州
多善政民息之遷崇政殿說書改起居郎假資政
殿大學士充祈請國信使使金潁行上有面諭受
書事而國書不載成大至燕山草私奏具言受書
式懷之入及進國書時詞氣慷慨殿上方傾聽聞
而成大忽搢笏出私奏舉朝大駭左右標起之屹
不為動太子欲殺成大越王止之竟達具書而歸
遷中書舍人出知廣西靜江府除四川制置使召
權吏書拜參知政事加大學士薨成大素有文名

尤工於詩有石
湖等集行世

擬古

彎環樓前月掩仰樓上人人月不得語相看兩凝顰西
窗回紋機織徧金字春聊可自持玩何由將寄君

刺潰淖

潰淖盤渦之大者峽江水壯則有之或大如一間屋
相傳水行峽底遇暗石則潰起已而下旋為窩然亦
未嘗有定處或無故突然而作叵測也舟行遇水小

則欹傾大則顛覆險惡之名聳天下

峽山饒暗石水狀日千變不愁灘瀧來但畏漬淖見人
言盤渦耳夷險顧有間仍于非時作未可一理貫安行
方慰殺無事忽翻練突如湯鼎沸翕作茶磨旋勢迫中
成窪怒霽外始暈已定稍安慰倏作更驚眩漂漂浮沫
起疑有鬻鯨喫勃勃駭浪騰復恐蟄鼃扞篙師瞪褫魄
灘戶呀雨汗逡巡怯大敵勇往決鏖戰幸免與齊入還
憂似蓬轉驚呼招竿折奔救竹竿斷九死船頭爭萬苦

石上牽旁觀兢薄水撇過捷飛電前余叱馭來山險固
嘗徧今者擊楫誓豈復憚波面澎澎三峽長颭颭一葦
亂既微掬指忙又匪科頭慢天子賜之履江神敢吾玩
但催疊鼓轟往助雙櫓健

河豚歎

鮪生藜莧腸食事一飽足腥腐色所難况乃懷酖毒膨
亨强名魚殺氣孕慘黷既非養生具宜謝砧几酷吳儂
真差事網索不遺育捐生決下箸縮手汗童僕朝來里

中子饒吻不待熟濃睡喚不應已落新鬼錄百年三寸
咽水陸富有較一物不登俎未負將軍腹為口忘計身
饕死何足哭作俑者誰歟至今走末俗或云先王意除
惡如執叔逆梟與毒獍歲歲參幣玉芟夷入薦羞蓋欲
殲種族死生有定數斷命烏可續適丁是時者未易一
理局黿鼎子公怒羊羹華元舛異味古所珍無事苦畏
縮駢頭訐此語戒諭祇取瀆聾盲死不悟明知諒已燭

九月三日宿胥口始聞雁

故人久不見乍見雜悲喜新雁如故人一聲驚我起把
酒不能觴送目問行李曾云行路難空濛千萬里塞北
多關山江南渺雲水風高吹汝瘦旅伴今餘幾斜行不
少駐減沒蒼煙裏羈遊吾亦倦客程殊未已扁舟費年
華短纜繫沙尾物性各有役冥心聽行止江郊匝地熟
場圃平如砥歸期且勿念共飽豐年米

新嶺

瘦馬兀曹騰荒鷄號蒼莽絲窠宵朝露離落萬蛛網宿

雲拂樹過飛泉擘山響老桑踞潛虬怪蔓挂騰蟒山行
何許深空翠滴羈鞅釀愁積雨寒破悶朝日放瞳瞳赤
幟張昱昱金鉦上浮動艸花馥清和野禽唱僕夫有好
語沙平路如掌惟憂三溪阻橋斷山水漲

古風上知府秘書

神仙絕世立功行聞清都玉符賜長生籙雲遊紫虛雞
犬爾何知偶舐藥鼎餘身輕亦仙去罡風與之俱俯視
舊籬落眇莽如積蘇非無鳳與麟終然似蟲魚微物豈

有命政爾謝泥塗時哉適丁是邂逅真良圖

初入峽山效孟東野

峽山偏而峻峽水湍以碕峽草如毳毛峽樹多膠枝峽
禽惟杜鵑血吻日夜啼峽馬類黃狗不能長鳴嘶峽曉
虎跡多峽暮人跡稀峽路如登天猿鶴不能梯僕夫負
喘哭我亦呻吟悲悲吟不成章聊賡峽哀詩

麻線堆 峽口驛前大山崛起舊路攀援而上縈
紆如線十五年前浮圖德寶始沿澗伐木作新

路不復登山余觀峽路皆未嘗經修感德寶之事作麻線堆詩一首以風夔路使者及歸峽二

州長史云

雲木盪胸起鬱峨一峰危上有路千折纏縷如紫絲是為麻線堆厥險天下稀偪仄容半足顛隄寧復稽騰猿尚愁苦遊子將安之浮屠德寶者悲智緒等慈隨山刊古木尋壑得長磯輿梁捷飛度布石綿階梯自從新路改重趼無齋咨縣有孫少府琬琰劉文詞勿云此事小

惟有行人知况觀峽山路由來欠平治官吏既弗跡誰
宵深長思天險固自若當令路成蹊土工運畚鍤石工
操鑿椎烈火敗礲确築沙填隙巖多用百夫力遠無五
旬期但冀米鹽給不煩金幣支非客敢竊議道旁詢旄
倪身雖雪山戍亦願助毫釐工費嗟小哉政須賢有司
東有管夷陵西有葉秭歸上維沈隱侯夔臺今吏師下
維熊繹孫長材佐州麾豈吾金閨彥不如林下緇縣知
議克合了此一段奇舟楫避潢潦置郵疾馳憧憧吳

蜀客來往當無時仍磨鑱天石大書四賢詩不佞願秉
筆遠繼峽口碑

曉發飛鳥晨霞滿天少頃大雨吳諺云朝霞不出
門暮霞行千里驗之信然戲紀其事

朝霞不出門暮霞行千里今晨日未出曉氣散如綺心
疑雨再作眼轉雲四起我豈知天道吳農諺云耳古來
占霧霓說者類恢詭飛雲走羣羊停雲浴三旆月當天
畢宿風自少女起爛石燒成香汗礎潤如洗逐婦鳩能

拙穴居狸有智蜉蝣強知時商羊與聞計垤鳴東山鸛
堂審南柯蟻或加陰石鞭或議陽門閉或云逢庚變或
自換甲始刑鷙與象龍聚訟非一理不如老農諺響應
捷如鬼喊詩敢夸博聊用醒午睡

重遊南嶽

捨舟得馬如馭氣步入青松三十里我從蠻嶺瘴煙來
不怕雨雲埋嶽趾憶昔南征疑廟庭往來無恙神所祉
當時已有歸田願帝臨此心如白水煌煌南正館于東

手握八觚溫玉璽駿奔漕霍左右輔好生不殺扶炎紀
崇禋竣事曉壇空躋攀小試青鞵底不知雲磴幾千丈
但見漫山白虎尾石頭招我上南臺瑞應闌干天半倚
福巖鐘聲過橋東髣髴三生如夢裏堂中尊者已先去
苔鎖巖扉何日啓竹嫌磽确老愈瘦松畏高寒蟠不起
癯儒尚病怕深登幽討未窮行且止我評七十二高峰
鬱律穹隆少觀美儼然可瞻不可玩往往雄尊如負辰
乃知嶽鎮益深厚不與他山爭秀偉區區獻狀眩兒童

乳洞淡巖真戲耳

離堆行

殘山狼石雙虎卧斧跡鱗皴中鑿破潭淵油油不敢唾
下有猛虎踰鐵鑠自從分流注石門西州杭稻如黃雲
封羊五萬大作社春秋伐鼓蒼煙根我昔官稱勸農使
年年來激西江水成都火米不論錢絲管相隨看蠶市
款門得得酌清尊椒漿桂酒刪羶葷妄欲一語神豈聳
更願愛羊如愛人

夜宴曲

金麟噴香煙龍蟠玉燈九枝青闌干明瓊押帶湘簾斑
風幃繡浪千飛鸞舞娥紫袖如弓彎雲中一笑天解顏
銜杯快卷玻璃乾花樓促箭春宵寒二十五聲宮點闌
韓無咎檢討出示所賦陳季陵戶部巫山圖詩仰
窺高作歎息久之余嘗攷宋玉談朝雲事漫稱
先王時本無據依及襄王夢之命玉為賦但云
綰薄怒以自持曾不可乎犯干後世弗察一切

溷以媒語曹子建賦宓妃亦感此而作此嘲誰
當解者輒用此意次韻和呈

瑤姬家山高挿天碧叢奇秀古未傳向來題目經楚客
名字經度峨岷前是邪非邪莽難識喬林古廟常秋色
暮去行雨朝行雲翠帷瑤席知何人峽船一息且千里
五兩竿頭見幡尾仰窺仙館至今疑行人問訊居人指
千年遺恨何當申陽臺愁絕如荒村高唐賦裏人如畫
玉色頽顏元不嫁後來饑客眼長寒浪傳樂府吹復彈

此事牽連到溫洛更憐塵襪有無間君不見天孫住在
銀濤許塵間猶作兒女語公家春風錦瑟旁莫為此圖
虛斷腸

倦繡

獨兒弄暖緣皆走花風薰人濃似酒困來如醉復如愁
不管低鬟釵燕溜無端心緒向天涯想見檣竿幡脚斜
槐陰忽到簾旌上遲卻尋常一線花

嶺上紅梅

霧雨臙脂照松竹江南春風一枝足滿城桃李各嫣然
寂寞傾城在空谷城中惟解惜娉婷遊子路旁空復情
花不能言客無語日暮清愁相對生

瞿唐行

七月十九日至夔子灩澦徹髮不可犯是夜水漲及
山腹詰旦視灩澦則已在水中土人云此青草齊也
可以冒險而入遂鼓擢略其頂而過郡中遣候兵立
山上每一舟平安則搖幟以召後舟白鹽赤甲皆峽

口大山黃嵌黑石皆峽中至險處入峽西岸有聖泉
舟人或向之疾呼曰人渴也泉即迸下杯許復乾余
舟過甚急未之試也

川霸知我歸有程一夜漲痕千丈生中流擊楫洶作氣
夾峰旗鼓呀失聲不知灝瀕在船底但覺瞿唐如鏡平
鑿峽疏川狠石破號山索飲飛泉驚白鹽赤甲轉頭失
黑石黃嵌拚命輕草齊增肥無泊處竹枝凝葉空餘情
人間險路此奇絕客裏驚心吾飽更劒閣翻成蜀道易

請歌范子瞿唐行

巫山高

余舊嘗題陳季陵巫山圖考宋玉賦意辯高唐之事
甚詳今過陽臺之下復作樂府一首世傳瑤姬為西
王母女嘗佐禹治水廟中石刻在焉

濕雲不收煙雨霏峽船作灘梢廟磯杜鵑無聲猿叫斷
惟有饑鴉迎客飛西真功高佐禹跡斧鑿鱗皴倚天壁
上有瑤簪十二尖下有黃湍三百尺蔓花蚪木風煙昏

蘇珮翠帷香火寒
霧游飄忽定何許
時有行人開廟門
楚客詞章元是諷
紛紛餘子空嘲弄
玉色頽顏不可干
人間錯說高唐夢

今人多為神女作辯不知皆昔賢所已言耳

大了隘

峽行五程無聚落
馬頭今日逢耕鑿
麥苗疎瘦豆苗稀
椒葉尖新柘葉薄
家家婦女布纏頭
背負小兒領垂瘤
山深生理卻不乏
人有銀釵一雙挿

姑惡

姑惡水禽以其聲得名世傳姑虐其婦婦死所化東坡
詩云姑惡姑惡姑不惡妾命薄此句可以泣鬼余行
苔雲始聳其聲晝夜哀厲不絕客有惡之以為此必
子婦之不孝者余為作後姑惡詩

姑惡婦所云恐是婦偏辭姑言婦惡定有之婦言姑惡
未可知姑不惡婦不死與人作婦亦大難已死人言尚
如此

寒食郊行書事

隴麥欣欣綠山桃寂寂紅
帆邊漁斷浪木末酒旗風
信步隨芳草迷途問小童
賞心添脚力呼渡過溪東

宿義林禪院

瞑氣昏如雨禪房冷似冰
竹間東嶺月松杪上方燈
驚鵲盤金刹流螢拂玉繩
明朝窮脚力連夜斬崖藤

田舍

呼喚攜鉏至安排築圃忙
兒童眠落葉鳥雀噪斜陽
烟白村聲遠林青野氣香
樂哉今歲事天末稻雲黃

清明日狸渡道中

灑灑霑巾雨披披側帽風
花然山色裏柳卧水聲中
石馬立當道紙鷲鳴半空
墻間人散後烏鳥正西東

次韻溫伯城上

閉戶成癡坐扶藜得意行
樓臺浮霽色市井碎春聲
雪盡小橋出烟消千嶂生
病多無脚力遙羨落鴻輕

安鄉縣西晚泊

水濶烏鳥倦墟寒童僕饑
一灣村縣過百折暮江遲
曉

夢孤燈見春陰病骨知簡書寧不畏旅力奈先疲

道中

月冷吟蛩草湖平宿鷺沙客愁無錦字鄉信有燈花蹤
跡隨風葉程途犯斗槎君看枝上鵲薄暮亦還家

寒食郊行書事

野店垂楊步荒祠苦竹叢鷺窺蘆泊水烏啄紙錢風媪
引濃妝女兒扶爛醉翁深村時節好應為去年豐

病中夜坐

村巷秋春遠禪房夕磬深
饑蚊嘗遶鬢暗鼠忽鳴琴
薄薄寒相中稜稜瘦不禁
時成洛下詠卻似越人吟

十二月十二日枕上曉作

竹響風成陣窗明雪已花
柴扉冷凍犬紙瓦啄饑鴉
宿酒欺寒力新詩管歲華
日高猶擁被蓐食媿鄰家

花山村舍

潦退灘灘露沙虛岸岸顏
澗聲穿竹去雲影過山來
柳茵粘枝住桑花共葉開
庵廬少來往門巷濕蒼苔

南塘寒食書事

埂外新陂綠岡頭宿燒紅裹魚蒸菜把饋鴨鎖筠籠酒
侶晨相命歌場夜不空土風并節物不與故鄉同

豫章南浦亭泊舟

繡檻臨滄渚牙檣挿暮沙浦雲沈斷雁江雨入昏鴉野
曠天何近春寒歲未華朝來風一席隨處且浮家

醴陵驛

綠水橋邊縣門前柳已黃人稀山木壽土瘦水泉香乍

脫泥中滑還嗟埃子長儲洲何日到鼓枻上滄浪

巴東峽口

水宿頻歎側徒行又險艱舟危神女峽馬瘦鬼門關照
夜燒畬隴緣雲種竿山催成頭雪白休說鬢絲班

初入巫峽

^鑽火巴東岸樅金峽口船束江崖欲合漱石水多漩卓
午三竿日中間一罅天偉哉神禹跡疏鑿此山川

巫山縣

自此復登陸至夔門縣前掉石灘最險登岸以過舟
謂之盤灘城樓對高唐門此去瞿塘不百里縣人以
郭西流石堆為水信流石沒則灩澦如馬矣

借馬巫山縣盤舟掉石灘梅肥朝雨細茶老暮烟寒門
對高唐起江從灩澦難流堆三尺在旅夢一枝安

鞭春微雨

旂勝絲絲雨笙歌步步塵一年新樂事萬里未歸人雲
薄竟慳雪酒濃先受春送寒東作近慚愧耦耕身

二月三日登樓有懷金陵宣城諸友

百尺西樓十二欄日遲花影對人閒春光已入片時夢
寒食從今數日間折柳故情都望斷落梅新曲與愁關
詩成欲訪江南便千里烟波萬疊山

天平先隴道中時將赴新安掾

霜橋冰碇淨無塵竹塢梅溪未放春百疊海山鄉夢熟
三年江路旅愁新松楸永寄孤窮淚泉石終收漫浪身
好住鄰翁各安健歸來相訪說情真

趙聖集誇說少年俊遊用前韻記其語戲之

京塵紅軟撲雕鞍年少王孫酒量寬倚袖竹風憐翠薄
捧杯花露怯金寒黃雲城上栖烏曲綠水池邊鬪鴨欄
別後相思惟故物壁煤侵損扇中鸞

玉堂寓意

摘文窗戶九霄中岸幘燒香愧老農上直馬歸催下鑰
傳更人唱促鳴鐘金城截嶽雲千雉碧瓦參差月萬重
骨冷魂清都不夢玉階蕭瑟聽秋蛩

初約鄰人至石湖

窈窕崎嶇學種園此生丘壑是前緣
隔離東日浮天水當戶南山匝地烟
春入葑田蘆綻筍雨傾沙岸竹垂鞭
荒寒未辦招君醉且吸湖光當酒泉

入秭歸界

山根繫馬得漿家深入窮鄉事可嗟
蚯蚓惹人能作瘡茱萸隨俗強煎茶
幽禽不見但聞語野草無名都著花
曲曲迢迢殊未艾去程方是問三巴

立春日郊行

竹擁溪橋麥蓋坡
土牛行處亦笙歌
麴塵欲暗垂垂柳
醅面初明淺淺波
日滿縣前春市合
潮平浦口暮帆多
春來不飲兼無句
奈此金旂綵勝何

復自姑蘇過宛陵至鄧步出陸

漿家饋食槿為藩
酒市停驂竹廡門
紅樹亭亭樓晚照
黃茅杳杳被高原
飲溪有迹於菟過
掠草如飛朴渥翻
車軌如溝平地少
飽帆天鏡憶江村

早發竹下

結束晨裝破小寒跨鞍聊得散疲頑行衝薄薄輕輕霧
看放重重疊疊山碧穗炊煙當樹直綠紋溪水趁橋灣
清禽百轉似吟客正在有情無思間

送周子充左史奉祠歸廬陵

黃鵠飄然下九關江船載月客俱還名高豈是孤臣願
身退聊開壯士顏傾蓋當年真旦暮霑巾明日有河山
後期淹速都難料相對猶憐鬢未斑

與正夫朋元遊陳侍御園

沙際春風轉物華
意行聊復到君家
年年我是重來客
處處梅皆舊識花
官減不妨詩事業
地寒猶辦醉生涯
城中馬上那知此
塵滿長裾席帽斜

次韻韓无咎右司上巳汎湖

休沐良辰不待晴
徑稱閒客此閒行
春衫欺雨任教冷
病眼得山原自明
抹黛濃嵐圍坐晚
揉藍新淥沒篙清
棲鴉未到催歸去
想被東風笑薄情

宿直玉堂拜賜御酒

歸鴉陸續墮宮槐
簾幔參差晚不開
小雨遂將秋色至
長風時送市聲來
近瞻北斗璿璣次
猶夢西山翠碧堆
慚愧君恩來甲夜
殿頭宣勸紫金杯

李翬知縣作亭西湖上
余用東坡語名之曰飲綠
遂為勝槩

芷葺蓮巢喚客遊
蘆鞭席帽為君留
未論吹水堪添酒
且要移牀學枕流
乍霽卻陰梅釀雨
暫暄還冷麥催秋

石湖也似西湖好煩向蒼烟問白鷗

發荊州

初上蓬籠竹竿船始知身是劔南官沙頭沽酒市樓暖
徑步買薪江墅寒自古秦吳稱絕國于今歸峽有名灘
千山萬水垂垂老只欠天西蜀道難

十二月十八日海雲賞山茶

追趁新晴管物華馬蹄鬆快帽簷斜天南臘盡風晞雪
冰下春來水漱沙已報主林催市柳仍從掌故問山茶

豐年自是驩聲沸更著牙前畫鼓過

有懷石湖舊隱

浩蕩沙鷗久倦飛
摧頽樗馬不勝鞿
官中風月常虛度
夢裏關山或暫歸
橘社十年霜欲飽
鱸江一雨水應肥
冷雲著地塘蒲晚
誰為披簑暖釣磯

晚步宣華舊苑

喬木如山廢苑西
古溝疎水靜鳴池
吏兵憲宰番更後
樓閣崔嵬欲暝時
有露冷螢猶照草
無風驚雀自遷枝

歸來更了塵書債目青昏花燭穗垂

西樓秋晚

樓前處處長秋苔
俛仰璿杓又欲回
殘暑已隨梁燕去
小春應為海棠來
客愁天遠詩無託
吏案山橫睡有媒
晴日滿窗見鶯散
巴童閒按鴨爐灰

枕上

一枕經春似宿醒
三衾投曉尚淒清
殘更未盡鴉先起
虛幌無聲鼠自驚
久病厭聞銅鼎沸
不眠惟望紙窗明

摧頽豈是功名具燒藥爐邊過此生

婆羅平

仙聖飛行此是家路逢真境但驚呀神農嘗外盡靈藥
天女散餘多異花嵐雨逼衣寒似鐵冰泉炊米硬于沙
峰頭事事殊塵世缺甃跳梁笑井蛙

變門即事

變水不可飲取之
卧龍十里之外

峽行風物不堪論伴暑驕陽雜瘴氛人入荆南多附贅
山從夔子盡侵雲竹枝舊曲元無調麴米新篇但有聞

試覓清冷一杯水筒泉須自卧龍分

鄂州南樓

誰將玉笛弄中秋黃鶴飛來識舊遊
漢樹有情橫北渚蜀江無語抱南樓
燭天燈火三更市搖月旌旗萬里舟
卻笑鱸江垂釣手武昌魚好便淹留

光福塘上

指點炊煙隔莽蒼午餐應可寄前莊
鷄聲人語小家樂木葉草花深巷香
春去已空衣尚絮雨來何晚稻初芒

祇今農事村村急第一先陂貯水塘

致一齋漫述

文書煙海困浮沈不覺盤跚百病侵
偶問客年驚我老忽聞鶯語歎春深
今朝麥粒黃堪麪幾日秧田綠似針
除卻一犁春雨足眼前無物可關心

請息齋書事

覆雨翻雲轉手成紛紛輕薄可憐生
天無寒暑無時令人不炎涼不世情
栩栩美來俱蝶夢喑喑能有幾鷄鳴

冰山側畔紅塵漲不隔瑤臺月露清

重陽後菊花

二首

寂莫東籬濕露華依前金靨照泥沙
世情兒女無高韻
只看重陽一日花

過了登高菊尚新
酒徒詩客斷知聞
恰如退士垂車後
勢利交親不到門

續長恨歌

四首

金盤潋灩曉妝寒
國色天香勝牡丹
白鳳詔書來已暮

六宮鉛粉半春闌

紫微金屋閉春陽
石竹山花卻自芳
莫道故情無覓處
領巾猶有隔生香

人似飛花去不歸
蘭昌宮殿幾斜暉
百年只有雲容姊
畱得當時舊舞衣

帝鄉雲馭若為畱
八景三清好在不
玉笛不隨雙鶴去
人間猶得聽梁州

秦淮

不將行李試間關
誰信江湖道路難
腸斷秦淮三百曲
船頭終日見方山

五月聞鶯

桑陰淨盡麥頭齊
江上聞鶯每歲遲
不及曉風鶉鴂子
迎春啼到送春時

釣臺

山林城市兩塵埃
邂逅人生有往來
各向此心安處住
釣臺無意壓雲臺

餘杭

春晚山花各靜芳
從教紅紫送韶光
忍冬清馥薔薇醖
薰滿千村萬落香

四十八盤

詰曲不前如宦拙
歌傾當面似交難
若將世路比山路
世路更多千萬盤

歸州竹枝歌

東鄰男兒得湘纍
西舍女兒生漢妃
城郭如村莫相笑

人家閬閬似渠稀

夔州竹枝歌

五首

五月五日嵐氣開南門競船爭看來雲安酒濃麴米賤
家家扶得醉人迴

赤甲白鹽碧叢叢半山人家草木風榴花滿山紅似火
荔枝天涼未肯紅

新城果園連灤西枇杷壓枝杏子肥半青半黃朝出賣
日午買鹽沽酒歸

癭婦赴墟城裏來
十五市南街行人莫笑女麤醜
兒郎自與買銀釵

白頭老媪簪紅花
黑頭女郎三髻丫
背上兒眠上山去
採桑已閒當採茶

櫻桃花

借暖衝寒不用媒
勻朱勻粉最先來
玉梅一見憐癡小
教向旁邊自在開

寶相花

誰把柔條夾砌栽，壓枝萬朶一時開。
為君也著詩收拾，題作西樓錦被堆。

妃子園

涪陵荔子
天寶所貢

露葉風枝驛騎傳，華清天上一嫣然。
當時若識陳家紫，何處蠻村更有園。

淳熙五年四月二日直宿玉堂懷舊二絕

桂海冰天老歲華，直廬重上玉皇家。
當年曾識青青鬢，惟有東牆一架花。

雪山刁斗不停撾夜把軍書敢顧家珍重玉堂今夜夢
靜聞宮漏隔宮花

北城梅為雪所厄

凍蕊粘枝瘦欲乾新年猶未有春看雪花祇欲欺紅紫
不道梅花也怕寒

虞姬墓

劉項家人總可憐英雄無策庇嬋娟戚姬墓處君知否
不及虞兮有墓田

最高峰望雪山

大面峰頭六月寒
神燈收罷曉雲斑
浮空忽湧三銀闕
云是西天雪嶺山

元夕

粉痕紅點萬花攢
玉氣枝光寶月團
簾箔通明香似霧
東風無處著春寒

宋元詩會卷三十八

欽定四庫全書

集部
宋元詩會卷
三十九
四十

詳校官中書_臣陸 湘

主事銜_臣徐以坤覆勘

總校官知縣_臣繆 琪

校對官中書_臣牛稔文

謄錄監生_臣畢 桂

欽定四庫全書

宋元詩會卷三十九

兵部主事陳焯編

王十朋

字龜齡温州樂清人少以文行名鄉里聚徒梅溪
受業者衆入太學主司異其文適秦檜死上親政
策士十朋對策萬餘言上嘉其淹通醇正擢第一
學者傳誦擬諸鼂童授給興府簽判召為祕書郎
兼建王府教授時言路久塞十朋與馮方胡憲查
禽李浩相繼論事太學生為五賢詩除著作郎遷
宗丞請祠歸孝宗立起知嚴州召對稱旨除起居
郎十朋觀上英銳每見必陳恢拓大計上雖嘉納

而親賢遠奸其說不能盡行除吏侍力辭出知饒
州移湖州所至布工思恤民隱民間繪像祠之去
則流涕如思父母晚得足疾以龍
圖閣學致仕卒年六十諡忠文

雜詩二首

直道疾伊優壯懷憎靡曼海上豕方牧夜中牛屢飯半
生營一名偃蹇未如願青銅忽自照白髮已堪歎斥鷃
適蓬蒿大鵬搏九萬物情貴得所奚用求自獻富貴似
可喜貧賤亦何怨

古書恣掀翻古意薄窺瞰心將遊寂寞語復攻苦淡實

淺名寄浮才疎得僣濫守志懼不堅入道恐成暫性天
戒戕賊心猿思繫纜有友頻琢磨無官自校勘澹然學
揚雄不恨儲無甌

刪畝 三首

仲尼作春秋垂訓千萬年古者父母讐義不共戴天莊
同父何在乃與齊侯田魯國無臣子君親義茫然齊紀
不並立諸兒得稱賢善惡不可掩筆削至今傳

飛飛古帝魂哀哀寄春怨異鄉節物新故國人事變訴

亡誰肯憐啼苦血空濺雲安再拜人傷哉不復見

兀兀窗下士筆耕志良苦黃卷對聖賢慷慨深自許一朝出干祿得失戰胸宇曲意阿有司諛言徇人主貪榮無百年貽謗有千古丈夫宜自貴清議重刀斧

觀國朝故事

三首

昔在景德初旄頭震邊關朝廷用萊公決策幸澶淵高瓊雖武夫能發忠義言咏詩退敵騎用魏樞相顏鑾輿至北城斷橋示不還一箭斃闕覽夜半歌凱旋至仁不

忍殺和好垂百年偉哉澶淵功天子能用賢

昔在康定初元昊叛西陲朝廷起韓范節制閫外師二
公人中龍材略超等夷胸中百萬兵對面千里機不比
大老子而令敵能欺深期復靈夏重勒燕然碑軍中果
興謠西賊心胆隳逆節遂稱臣戰士解甲歸社稷安泰
山四海絕瘡痍堂堂寧復有為作思賢詩

昔在元祐初朝廷用老成元惡首竄殛賢雋偕彙征廉
帷八年政內外咸清明四荒各自守天下幾太平紹聖

黨論起宵人壞典刑二蔡倡繼述曲學尊金陵忠良投
海島黨籍編姓名春秋亦獲罪學者專三經心術遂大
壞風俗從此傾養成前日禍中原厭灰塵我欲著一書
善惡深勸懲六賊未足罪禍端首熙寧

遊西岑遇雨

西岑風物秋更嘉杖藜出郭歡無涯深村有酒隔烟渚
共乘小艇穿蘆花羅裳淖約越溪女茅舍迫窄吳儂家
牀頭新釀喜正熟千金倒甕傾流霞天公妬我一日樂

俄然雨腳來如麻醉歸扶路泥沒股冠巾不整頭髮
人生貴在適意耳安能局縮身如蝸杖頭有錢即相覓
明日更泛僊源槎

西征

紹興建元二十二良月壬午時丁未王子辭家遊帝都
出門滿眼思親淚鵲鴿送我過原隰朋友攜尊宿蕭寺
朝離黃塘惜分別莫宿青江嗟獨自初心滿擬遊鴈山
行止非人輒乖異黃蟲留連越三宿故舊過從日沈醉

鄭生伴我千里行近古人無此風義皇華亭上一回首
陡覺眉頭起鄉思西江十里浮橋邊把酒登樓吟擁鼻
山行初逢建子月入眼梅花已春意前觀三渡覺非舊
下視兩灘真可畏渡頭僊人還笑我髭鬚如棘猶名利
欲入天台觀石橋行李怱怱未能遂途中邂逅張老丞
十五年前樂清尉自嗟吾非沈謝輩面目從來苦難記
飛泉枕上夢成魔達旦思家可曾睡細雨濛濛入關嶺
旅邸重尋舊題字雨脚微收過天姥洗出峰巒疊蒼翠

劉阮祠荒土猶赤溪山真是神僊地道旁石現小金僊
傳舍荒涼誰廢置柘溪竹染兒女痕石嶺松含柱梁麗
路入南明觀石佛樓閣岩堯更深邃八年行役兩來遊
岳上題詩記前事乘興剡溪尋故人久別相逢雜悲喜
義風吹水送行舟越國江山滿瞻視十四歲娥孝且烈
三百里湖明更媚千巖競秀壑爭流終日貪看趣遙寄
西興渡口聲如雷銀浪崔嵬魄驚悸江神為我風色平
天闕煌煌瞻象魏賢關訪舊話酸辛更食藟鹽舊滋味

學官欲以職事留自媿非才力辭避觀臺雲物端可書
宮線初長日南至龍山僦舍觀大禮儀仗森然典文備
人臣貴盛古今無秦公父子俱為使景靈告謝樂聲回
鸛鷺花枝侈君賜西遊連日睹天顏和氣氤氲散憔悴
歲云莫矣却歸來捉筆書為子役志

柘溪道旁斑竹

男兒有淚不染竹當作包胥賈生哭湘源遺種雖可愛
節目尚餘兒女態誰能千里移此根出門又恐添啼痕

不如還家種慈竹簷前不厭千竿綠

遊簫峰

蠟屐穿雲去山深喜路通人家煙色裏古寺水聲中金
澣星猶在丹成竈已空吹簫人不見臺下想僊風

送劉方叔兼簡全之

相見無多日依前又索居斷魂梅的皪過眼柳蕭疎匹
馬來時路征鴻別後書君歸見溫叟為我問何如

宿黃巖妙智院

問訊開山始于今二百年徑幽微見竹社廢尚遺蓮觀
頌思元老遊庵憶舊禪恩恩一宿客未盡滌塵緣

宿浮橋

落日丹丘下西江十里西浮橋通古道逆旅傍清溪夜
靜水聲細曉陰山色迷吾鄉在何處天遠白雲低

詠柳

東君於此最鍾情粧點村村入畫屏向我無言眉自展
與人非故眼猶青縈牽別恨絲千尺斷送春光絮一亭

葉底黃鸝音更好隔溪煙雨醉時聽

寄夢齡昌齡弟

老去生涯集百憂一身萍泛剡溪頭釣魚溫水同侯喜
旅食新豐類馬周長鋏有時思海味短檠終夜照離愁
也知四海皆兄弟能似天生羽翼不

行香報恩精舍

籃輿拂曉出東關鐘磬聲聞杳靄間心欲報恩頻入院
人逢勝己更觀山竹香細細禪房靜江水湯湯野渡閒

欲向漁翁問興廢黃鸝隔葉語綿蠻

陸游

字務觀越州山陰人年十二能詩文蔭補登仕郎以薦名在秦檜孫前為檜所惡檜死始赴福州寧憲簿孝宗即位賜進士出身語觸權貴出判州府范成大帥蜀游為參議官用文字交不拘禮法人議其放遂自號放翁稍遷禮部郎中修孝宗光宗兩朝實錄及三朝史未就詔游權同修國史實錄院同修撰免奉朝請尋兼祕監三年書成陞寶章閣待制封渭南伯致仕卒年八十五

秋郊有懷

二首

楚人固多孱妄謂秋可悲寧知河嶽間氣俗樂此時壯

士鳴鵬弓健馬嚼枯其日馳三百里榆關赴戰期陣雲
壓龍庭殺氣搖參旗熾火燎狐兔倒瀉黃金卮勒銘燕
然石千載鎮荒陲安能空山裏凍研哦清詩

秋山瘦益奇秋水淺可涉出城西風勁拂帽吹脫葉新
霜拆栗罇宿雨飽豆莢枯柳無鳴蜩寒花有穿蝶郊行
得幽曠頗覺耳目愜斷雲北山來欣然與之接挂冠易
事爾看鏡歎勛業永懷桑乾河夜渡擁馬鬣

醉歌

讀書三萬卷仕宦皆束閣學劍四十年木血未染鏑不
得為長虹萬丈掃寥廓又不為疾風六月送飛電戰馬
死槽櫪公卿守和約窮邊指淮淝異域視京雒於乎此
何心有酒吾忍酌平生為衣食歛版靴兩腳心雖了是
非口不給唯諾如今老且病鬢禿牙齒落仰天少吐氣
餓死實差樂壯心埋不朽千載猶可作

箕卜

孟春百草靈古俗迎紫姑厨中取竹箕冒以婦裙襦豎

子夾扶持揅筆祝其書俄若有物憑對畚不須與豈必
考中否一笑聊相娛詩章亦間作酒食隨所須興闌忽
辭去誰能執其袪持箕畚竈婢棄筆卧墻隅几席亦已
徹狼籍果與蔬紛紛竟何益人鬼均一愚

送子龍赴吉州掾

我老汝遠行知汝非得已駕言當送汝揮涕不能止人
誰樂離別坐貧至于此汝行犯胥濤次第過彭蠡波橫
吞舟魚林嘯獨脚鬼野飯何店炊孤權何岬樣判司比

唐時猶幸免咎箠庭參亦何辱負職乃可恥汝為吉州
吏但飲吉州水一錢亦分明誰能肆讒毀聚俸嫁阿惜
擇士教元禮我食可自營勿用念甘旨衣穿聽露肘履
破從見指出門雖被嘲歸舍却睡美益公名位重凜若
喬嶽峙汝以通家故或許望燕几得見已足榮切勿有
所啟又若楊誠齋清介世莫比一聞俗人言三日歸洗
耳汝但問起居餘事勿挂齒希周有世好敬叔乃鄉里
豈惟能文辭實亦堅操履相從勉講學事業在積累仁

義本何常蹈之則君子汝去三年歸我儻未即死江中
有鯉魚頻寄書一紙

雜興 四首

仕宦徧四方每出歸愈貧寒暑更質衣笑倒鄰里人今
年作史官坐縻太倉陳無如思歸何日夜望絕麟區區
牛馬走齷齪蟻蝨臣恩深老不報肝膽空輪囷

觀人如觀玉拙眼喜譏評得失顧在人玉固非所病慶
厯嘉祐間人才於斯盛王回僅一招石介棄不聘乃知

天下士成敗各有命願君姑安之天定豈不勝

魯山粹而博韶美曠且真石渠東觀中久矣無若人飛
僊驂鳳鸞豈久混世塵空餘文章在常與日月新我雖
不足數疇昔忝交親尚想秋燈下對影歌幅巾

君子尚大節又甚惡不情魯連故可人用意終近名千
載高夷齊采薇忘其生周公述易象所以貴幽貞去聖
雖已遠江左見淵明我讀飲酒詩朱絃有遺聲

病後作

骨相坐一寒仕宦經百謫晚入文昌省又坐煩言嘖詔
書復收召付以大典冊期年甫奏篇皇恐亟自劾歸來
稽山下三食新穫麥草屨布裙襦徒步老阡陌今年疾
屢作恍若將歸客道士言犯土拜章安舍宅巫言神去
幹剪紙招魂魄把臂忽自悟此豈屋漏脉盡去囊中藥
默觀鼻端白正氣徐自還鬼子何足磔

初秋夢故山覺而有作

二首

昔我東歸時父老迎船頭開篷相勞苦怪我領雪稠故

山何負君且作數月留豈知席未暖匹馬來南州蠻花
四時紅瘴霧日夜浮歸哉不可遲勿與婦子謀

杜宇真吾交勸去恨不速忠告輸肝肺厚意均骨肉陋
哉鷓鴣語揣我貧念祿竹鷄更鄙淺泥淖憂車軸秋風
嚴瀨清春雨戴溪綠行矣勿復疑照影巾一幅

石首縣雨中繫舟戲作短歌

庚寅去吳西適楚秋晚孤舟泊江渚荒林月黑虎欲行
古道人稀鬼相語鬼語亦如人語悲楚國繁華非昔時

章華臺前小家住茆屋雨漏秋風吹悲哉秦人真虎狼
欺侮六國囚侯王亦知興廢古來有但恨不見秦先亡
開窗酌汝一杯酒等為亡國秦更醜驪山冢破已千年
至今過者無傷憐

風雨中望峽口諸山奇甚戲作短歌

白鹽赤甲天下雄拔地突兀摩蒼穹凜然猛士撫長劍
空有豪健無雍容不令氣象少渟瀟常恨天地無全功
今朝忽悟始歎息妙處元在煙雨中太陰殺氣橫慘淡

元化變態含空濛正如奇材遇事見平日乃與常人同
安得朱樓高百尺看此疾雨吹橫風

岳池農家

春深農家耕未足原頭叱叱兩黃犢泥融無塊水初渾
雨細有痕秧正綠綠秧分時風日美時平未有差科起
買花西舍喜成婚持酒東鄰賀生子誰言農家不入時
小姑畫得城中眉一雙素手無人識空村相喚看繅絲
農家農家樂復樂不比市朝爭奪惡宦遊所得真幾何

我已三年廢東作

春愁曲

客話成都戲作

處義至今三十餘萬歲
春愁歲歲常相似
外大瀛海環九州
無有一州無此愁
我願無愁但歡樂
朱顏綠鬢常如昨
金丹九轉徒可聞
玉兔千年空擣藥
蜀姬雙鬟姪姪
嬌醉看恐是海棠妖
世間無處無愁到
底事難過萬里橋

錦亭

天公為我齒頰計遣飫黃甘與丹荔又憐狂眼老更狂
令看廣陵芍藥蜀海棠周行萬里逐所樂天公於我元
不薄貴人不出長安城寶帶華纓真汝縛樂哉今從石
湖公大度不計聾承聾夜宴新亭海棠底紅雲倒吸玻
璃鍾琵琶絃繁腰鼓急盤鳳舞衫香霧濕春醪凸盞燭
光搖素月中天花影立遊人如雲環玉帳詩未落紙先
傳唱此邦句律方一新鳳閣舍人今有樣

放歌行

君不見汾陽富貴近古無二十四考書中書又不見慈
明起自布衣中九十五日至三公人生窮達各有命拂
衣徑去猶差勝介推焚死終不悔梁鴻寄食吾何病安
用隨牒東復西獻諛耐辱希階梯初無公論判涇渭徒
使新貴矜雲泥稽山一老貧無食衣破履穿面黧黑誰
知快意舉世無南山之南北山北

山頭石

秋風萬木實春雨百草生造物初何心時至自枯榮惟

有山頭石歲月浩莫測不知四時運常帶太古色老翁
一生居此山脚力欲盡猶躋攀時時撫石三歎息安得
此身如爾頑

貧甚作短歌排悶

閒何濶逢諸葛畏人常憂不得活事不諧問文開不蹋
權門更可哀即今白髮如霜草一飽茫然身已老惟有
躬耕差可為賣劍買牛悔不早年豐米賤身獨饑今朝
得米無薪炊地上去天八萬里空自呼天天豈知

將進酒

我欲挽住北斗杓常指蒼龍無動搖春風日夜吹草木
只有榮盛無時凋我欲剗斷日行道陽烏當空月杲杲
非惟四海常不夜亦使人生失衰老如山積麴高崔嵬
大江釀作蒲萄醅頽然一醉三千杯借問白髮從何來

海棠歌

我初入蜀鬢未霜南充樊亭看海棠當時已謂目未睹
豈知更有碧鷄坊碧鷄海棠天下絕枝枝似染猩猩血

蜀姬艷妝肯讓人花前頓覺無顏色扁舟東下八千里
桃李真成僕奴爾若使海棠根可移揚州芍藥應羞死
風雨春殘杜鵑哭夜夜寒衾夢還蜀何從乞得不死方
更看千年未為足

短歌行

富貴得意如登天自計一跌理不全晝食忘味夜費眠
渠過一日如一年春蠶得衣耕得食農功初成各休息
賣酒壚邊紛鼓笛我過一年如一日二者求兼勢安可

與我周旋寧作我春城桃李豈不妍雪澗未妨松磊砢
人生禍福難遽論廟犧烏得為孤豚君不見獵徒父子
牽黃犬歲歲秋風上蔡門

湖山尋梅

鏡湖渺渺煙波白不與人間通地脉騎龍古僊絕火食
慣住空山齧冰雪東皇高之置度外正似人中巢許輩
萬木僵死我獨存本來長生非返魂

晚雨

蕭瑟度橫塘
霏微映繚牆
壓低塵不動
洒急土生香
聲入楸梧碎
清分枕簟涼
回頭忽陳迹
簷角挂斜陽

骨相

骨相元知薄
功名敢自期
病侵強健日
閒過聖明時
形勝輪臺地
飛騰瀚海師
江湖雖萬里
猶擬綴聲詩

病中

風雨暗江天
幽窗起復眠
忍窮安晚境
留病壓災年
客助修琴料
僧分買藥錢
餘生均逆旅
未死且陶然

排悶

老去知心少流塵鎖斷絃尊空問字酒囊罄作碑錢掃
葉供朝爨和泥補漏船胸中元浩浩白眼望青天

春殘

老墮空山裏春殘白日長庸醫司性命俗子議文章燭
映一池墨風飄半篆香此中有佳處袖手看人忙

村夜

寂寂山村夜悠然醉倚門月昏天有暈風輕水無痕迹

為遭讒遠身由不仕尊敢嗟車馬絕同社自鷄豚

遊雲山諸蘭若

花過木陰合溪雲生暮涼牛行響白水鷺下點青秧古
寺宛如昔穉松森已行者年不下榻童子為燒香

夜分不寐起坐園中至旦

涼氣蘇衰疾幽情入杖藜月驚孤鵲起天帶衆星西松
菊今彭澤山川古會稽清吟殊未愜喔喔已晨雞

春晚雜興 二首

池面萍初紫，牆頭杏已青。
攜兒撐小艇，留客坐孤亭。
相法無侯骨，生平直酒星。
正須遺萬事，莫遣片時醒。

小市湖橋北，幽居石埭西。
蒲深姑惡哭，樹密姊歸啼。
山茗封青箬，村醪坼赤泥。
平生汗簡手，投老慣扶犁。

晚秋山園即事

河岸風檣遠，村陂牧笛長。
短籬圍麋眼，幽徑繚羊腸。
照水鬚眉見，搓橙指爪香。
衣裘又關念，礎杵滿斜陽。

枕上

病叟少安枕驚禽無穩棲慵占賈誼鵬空感祖生雞野
勢風號北窗痕月過西元非破賊手只合架牛犂

遣興

兔徑遊觀足蝸廬卧起寬垂名千古易無媿寸心難燈
火娛清夜風霜變早寒一經家世事吾興未應闌

雜書幽居事

二首

抱瓮窮園叟還山老布衣死邊常得活閑處偶容歸釣
恐魚吞餌棋憂客墮機此心君會否洗盡百年非

庭曠多延月，齋空半貯雲。
松聲行路共，泉脈近鄰分。
采藥九蒸晒，朝真三沐熏。
林間有叢杞，繞屋夜猿猿。

秋懷

秋暑雖猶在，晨興氣已清。
蠻童掃荒徑，獠婢滌空鎗。
病樹有凋葉，殘蟬無壯聲。
書生守故態，已復理燈檠。

寓興

窮巷無來客，秋風獨浩歌。
壯年閒處老，佳日病中過。
甚欲攜長鏡，仍思擁短蓑。
逢山皆可隱，不必上三峽。

村居

富貴功名不擬論，且浮舴艋寄煙村。
生憎快馬隨鞭影，寧作癡人記劍痕。
樵牧相安欲爭席，比鄰漸熟約論婚。
晨昏夜績吾家事，正要遺風付子孫。

上虞逆旅見舊題歲月感懷

舴艋為家東復西，今朝破曉下前溪。
青山缺處日初上，孤店開時鶯亂啼。
倦枕不成千里夢，壞牆閒覓十年題。
漆園傲吏猶非達，物我區區豈足齊。

晚泊

半世無歸似轉蓬
今年作夢到巴東
身遊萬死一生地
路入千峰百嶂中
隣舫有時來乞火
叢祠無處不祈風
晚潮又泊淮南岸
落日啼鴉戍堞空

雨中泊趙屯有感

歸燕羈鴻共斷魂
荻花楓葉泊孤村
風吹暗浪重添纜
雨送新寒半掩門
魚市人烟橫慘淡
龍祠簫鼓鬧黃昏
此身且健無餘恨
行路雖難莫更論

馬上

殘年流轉似萍根馬上傷春易斷魂
烘暝花無經日蕊漲深水過去年痕
迷行每問樵夫路投宿時敲竹寺門
不信太平原有象牛羊點點散煙村

果州驛

驛前官路堠纍纍歎息何時送我歸
池館鶯花春漸老窗扉燈火夜相依
孤鸞怯舞愁窺鏡老馬貪行強受鞵
到處風塵常撲面豈惟京洛化人衣

赴成都泛舟自三泉至益昌謀以明年下三峽

詩酒清狂二十年又摩病眼看西川心如老驥常千里
身似春蠶已再眠暮雪烏奴停醉帽秋風白帝放歸船
飄零自是關天命錯被人呼作地僊

晚登望雲

一出修門又十年輩流多已珥金蟬衰如蠹葉秋先覺
愁似鰥魚夜不眠輦路疎槐迎駕處苑城殘日泛湖天
君恩未報身今老徙倚危樓一泫然

醉中感懷

早歲君王記姓名，只今顛顚客邊城。
青衫猶是鷓鴣行，舊白髮新從劍外生。
古戍旌旗秋慘淡，高城刁斗夜分明。
壯心未許全消盡，醉聽檀槽出塞聲。

登樓

從來好境遍人間，無奈勞生自欠閒。
江近時時吹白雨，樓高面面看青山。
歌聲哀怨傳三峽，行色淒涼帶百蠻。
嘉陽近諸蠻，流落愛君心未已。
夢魂猶綴紫宸班。

快晴

地濶天門斗柄回今朝紅日遍池臺新陽蘇醒春前柳
輕暖醫治雪後梅瓦屋螺青披霧出錦江鴨綠抱山來
衰翁也逐兒童喜旋撥文書近酒杯

雨後集湖上

野水交流自滿畦芳池新漲恰平堤花藏密葉多時綻
鶯占高枝盡日啼繡袂寶帟催結束金尊翠杓共提攜
白頭自喜能狂在笑襍蠻牋落醉題

晚登橫溪閣

樓鼓聲中日又斜，憑高愈覺在天涯。
空桑客土生秋草，野渡虛舟集晚鴉。
瘴霧不開連六詔，俚歌相合帶三巴。
故鄉可望應添淚，莫恨雲山萬疊遮。

小飲房園

宦遊到處即忘家，況得閒身管物華。
疎索故人緣病酒，折除厚祿為看花。
新高閣初巢燕，萍匝荒池已集蛙。
斟酌人生要行樂，燈前起舞落烏紗。

月下醉題

黃鵠飛鳴未免饑此身自笑欲何之
閉門種菜英雄老彈鋏思魚富貴遲
生擬入山隨李廣死當穿冢近要離
一樽強醉南樓月感慨長吟恐過悲

和范待制秋興二首

策策桐飄已半空啼螿漸覺近房櫳
一生不作牛衣泣萬事從渠馬耳風
名姓已甘黃紙外光陰全付綠尊中
門前剝啄誰相覓賀我今年號放翁

睡臉餘痕印枕紋秋衾微潤覆爐熏并桐搖落先霜盡
衣杵淒涼帶月聞佛屋紗燈明小像經奩魚蠹蝕真文
身如病驥惟思卧誰許能空萬馬羣

幽居

殊方飄泊向誰論小住僧廬亦所欣得飽罷揮求米帖
愛眠新著毀茶文摘蔬籃小霑清露斲藥鉏輕帶濕雲
從此生涯足幽事宦遊虛用半生勤

悲秋

一拋蓑笠雪溪舟八載涼州復益州
纔破繁華海棠夢又驚搖落井梧秋
曉班無復趨行殿晚境惟思老寢丘
病肺經旬疎酒盞愁來惟是上南樓

江樓醉中作

淋漓百榼宴江樓秉燭揮毫氣尚遒
天上但聞星主酒人間寧有地埋憂
生希李廣名飛將死慕劉伶贈醉侯
戲語佳人頻一笑錦城已是六年留

簡譚德稱

幼輿骨相稱山岳自要閒遊不避讒錦里先生為老伴
玉霄散吏是頭銜探春苑路花繁帽看月江樓酒滿衫
惟恨題詩無逸氣媿君陣馬與風颿

閒意

柴門雖設不曾開為怕人行損綠苔妍日漸催春意動
好風時捲市聲來學經妻問生疎字嘗酒兒斟瀝灩杯
安得小園寬半畝黃梅綠李一時栽

泊公安縣

秦關蜀道何遼哉
公安渡頭今始回
無窮江水與天接
不斷海風吹月來
船窗簾捲螢火鬧
沙渚露下蘋花開
少年許國忽衰老
心折柁樓長笛哀

登賞心亭

蜀棧秦關歲月道
今年乘興却東遊
全家穩下黃牛峽
半醉來尋白鷺洲
黯黯江雲瓜步雨
蕭蕭木葉石城秋
孤臣老抱憂時意
欲請遷都涕已流

沂谿

射的峰前禹廟東，短篷三扇卧衰翁。
閒攜清聖濁賢酒，重試朝南暮北風。
水落痕留紅蓼節，雨來聲滿綠蒲叢。
衝烟莫作怱怱去，擬看溪丁下釣筒。

自雲門之陶山肩輿者失道行亂山中有茅舍小
塘極幽邃求見主人不可意其隱者也

陂池幽處有茅堂，井臼蕭條草樹荒。
小鴨怯波時聚散，病蔬傷蠹半青黃。
兒童衝雨收魚網，婢子聞鐘上佛香。
我亦暮年思屏跡，數椽何計得連牆。

北窗

九陌黃塵早暮忙幽人自愛北窗涼
清吟微變舊詩律細字閒鈔新酒方
草木扶疎春已去琴書蕭散日初長
破羌臨罷檣頤久又了銅匱半篆香

霜天晚興

薄霜門巷不勝清小立湖邊夕照明
紅顆帶芒收晚稻綠苞和葉摘新橙
閒評琴價留僧話靜聽松聲領鶴行
壯志消磨渾欲盡西風莫動玉關情

累日無酒亦不肉食戲作此詩

小築精廬剝曲旁
枵然蟬腹與龜腸
酒錢覓處無司業
齋日多來似太常
雲碓旋舂菰米滑
風爐親候藥苗香
明年更入南山去
要試囊中服玉方

初夏遊凌氏小園

水滿池塘葉滿枝
曲廊危榭愜幽期
風和海燕分泥處
日永吳蠶上簇時
閒理阮咸尋舊譜
細傾白墮賦新詩
從來夏淺勝春日
兒女紛紛豈得知

庾信詩云夏
淺却勝春

臨安春雨初霽

世味年來薄似紗，誰令騎馬客京華。
小樓一夜聽春雨，深巷明朝賣杏花。
短紙斜行閒作草，晴窗細乳戲分茶。
素衣莫起風塵歎，猶及清明可到家。

題齋壁

二十餘年此結茆，園公谿父日論交。
風翻半浦亂荷背，雨放一林新筍梢。
隔葉晚鶯啼谷口，啼花雛鴨聚塘坳。
出門行罷還無事，借得丹經手自鈔。

地僻

地僻天教養散材
流年況著鬢毛催
青山自繞孤城去
畫角常隨晚照來
几淨雙鉤摹古帖
甕香小啜試新醅
乘槎不是星躔遠
無奈先生興盡回

北窗閒詠

陰陰綠樹雨餘香
半捲疎簾置一牀
得祿僅償賒酒券
思歸新草乞祠章
古琴百衲彈清散
名帖雙鉤搨硬黃
夜出灞亭雖跌宕
也勝歸作老馮唐

村居初夏

煮酒開時日正長
山家隨分當年光
梅青巧配吳鹽白
筍美偏宜蜀豉香
風暝絮催蠶上簇
雨餘閒看稻移秧
老夫見事真成晚
浪走人間兩鬢霜

七十

七十殘年百念枯
桑榆元不補東隅
但存隱具金鴉觜
那夢朝衣玉鹿盧
身世蠶眠將作繭
形容牛老已垂胡
客來莫問先生處
不釣娥江即鏡湖

正月二十日晨起弄筆

深院窗扉曉色遲
新愁宿醉兩參差
雨聲欲與夢相入
春意不隨人共衰
零落殘梅臨小約
縱橫野水赴清池
物華撩我緣何事
似恐頽年漸廢詩

題菴壁

身似蝸牛麤有廬
却緣無用得安居
地爐封火欺寒雨
紙閣油窗見細書
麪熟山僧分餽
飫船來溪友餉
新樗
閉門莫笑衰頽甚
讀易論詩亦未疎

睡起至園中

春風忽已遍天涯老子猶能領物華
淺碧細傾家釀酒
小紅初試手栽花野人易與輸肝肺
俗語誰能挂齒牙
更欲世間同省事勾回蟻戰放蜂衙

陳阜卿先生為兩浙轉運司考試官時秦丞相孫
以右文殿修撰來就試直欲首送阜卿得予文
卷擢置第一秦氏大怒予明年既顯黜先生亦
幾陷危機偶秦公薨遂已予晚歲料理故書得

先生手帖追感平昔作長句以識其事不知衰涕之集也

冀北當年浩莫分斯人一顧每空羣國家科第與風漢
天下英雄惟使君後進何人知大老橫流無地寄斯文
自憐衰鈍辜真賞猶竊虛名海內聞

按此詩殊未佳而其事可紀故存之

枕上作

蕭蕭白髮卧扁舟死盡中朝舊輩流萬里關河孤枕夢
五更風雨四山秋鄭虔自笑窮耽酒李廣何妨老不侯

猶有少年風味在吳牋著句寫清愁

先少師宣和初有贈晁公以道詩云奴愛才如蕭
穎士婢知詩似鄭康成晁公大愛賞今逸全篇
偶讀晁公文集泣而足之

士不逢時勇退耕閉門自號景迂生遠聞佳士輒心許
老見異書猶眼明奴愛才如蕭穎士婢知詩似鄭康成
早孤遇事偏多感欲續殘章涕已傾

春遊

春風隄上草萋萋草軟沙平護馬蹄似益微雲纔障日
如絲小雨不成泥千秋觀裏逢新燕九里山前聽午雞
追憶舊遊愁滿眼綵船曾繫畫橋西

新涼書懷

隣曲今年又有年垂髫戴白各欣然先輸官庾無逋賦
共賽神祠有社錢退傅寄聲情縝密

連得周丞相書細字滿幅

晦翁

入夢語蟬聯

昨夕夢朱元晦甚歡

燈前細與兒曹說蠹簡猶堪數

世傳

對食戲咏

得飽欣逢歲小穰時憑野餉誑枯腸橙黃出白金齏美
菰脆供盤玉片香客送輪囷霜後蟹僧分磊落社前薑
秋來幸是身强健聊為佳時舉一觴

冬日

室中恰受一蒲團也抵三千世界寬上策莫如扃戶坐
苦閒猶復取書看疏青飯輒枝梧老窗白爐新準備寒
堪笑此翁幽獨慣却嫌兒女話團圞

舟中作

晤語無人與遣愁出門聊復弄輕舟
山穿煙雨參差出水赴陂塘散漫流
隔葉雄雌鳴谷鳥傍林子母過吳牛
數家清絕如圖畫炊黍何妨得小留

村居書事

藥物枝梧病漸蘇門前野老笑相呼
春深水暖多魚婢雨足年豐少麥奴
小飲杯盤隨事具閒行巷陌倩人扶
題詩非復荒村句誰與丹青作畫圖

示客

一點昏燈兩部蛙
客來相對半甌茶
典衣未贖身饒蝨
治米無工飯有沙
每為采菱浮野艇
時因買藥宿山家
青鞋到處堪乘興
不獨雲門與若耶

春晚

新綠成陰小雨時
幅巾蕭散與閒宜
燕歸赴訴經年別
鶯晚分疏出谷遲
曉枕呼兒投宿酒
暮窗留客算殘棋
脩然此意風塵表
正恐羲皇未必知

初歸雜咏

小園五畝剪蓬蒿，便覺人間迹可逃。
盡疏珍禽添爾雅，更書香草續離騷。
樂苗可斲攜長鏡，黍酒新成壓小槽。
老入鵷行方徹悟，一官何處不徒勞。

久雨

梅天一日幾陰晴，對酒無聊醉不成。
巧厯莫能知雨點，孤桐那解寫溪聲。
林深鳥爵來無數，草茂鉏耰去即生。
明日雲開天萬里，御風吾欲過青城。

午睡

梅黃雨足喜初晴
投枕華胥夢已成
帳底香雲凝未散
手中書卷墮無聲
簾紋似水飛蠅避
鼻息如雷稚子驚
癡腹便便竟何有
已將嘲弄付諸生

龜堂初暑

淪漪一曲遶茆堂
葛帳紗巾喜日長
多事林鳩管晴雨
依人巢燕度炎涼
深枝著子纍纍熟
幽草開花冉冉香
安得此時江海上
與君袖手看人忙

村夜

入春雨雪無休日雨止猶陰未快晴萬竅怒號風不定
半輪斜照月微明百年辛苦農桑業五處睽離父子情
但得平安已為幸孤燈殘火過三更

時子虞調官行在
子龍阻風西陵子

修在閩子坦在海昌
子與子布子適守舍

出遊歸鞍上口占

渺渺煙波飛槳去迢迢野徑策驢還寄懷楚水吳山外
得意唐詩晉帖間每惜好春如我老誰能長日伴人閒

世間自是無兼得，勛業元非造物慳。

初夏閒居

二首

雲液初窮小瓮香，風漪乍展北窗涼。
巢乾燕乳蟲供哺，花過蜂閒蜜滿房。
閉戶不知春已去，鈔書但覺日方長。
所嗟詩思年來減，虛負奚奴古錦囊。

川雲漠漠雨冥冥，濁酒閒傾不滿瓶。
蠶簇尚寒憂繭薄，稻陂初滿喜秧青。
王師護塞方屯甲，親詔優民已放丁。
病起自憐猶健在，不須求應少微星。

恩封渭南伯唐詩人趙嘏為渭南尉當時謂之趙渭南後來將以予為陸渭南乎戲作長句

老向人間久倦遊君恩乞與渭川秋虛名定作陳驚坐
好句真慙趙倚樓棧豆十年霑病馬煙波萬里著浮鷗
就封他日輕裘去應過三峰處處留

病中戲咏

八十行加二清秋住故山新涼足眠睡舊疾害躋攀雪
白紛殘鬢梳黃染病顏疲牛卧斜日羸馬噉枯菅貧廢

兒孫學慈生僕妾頑贖衣時已迫貸米歲方難齋鉢僧
嘲薄盤飧客笑慳從今謝還往惟有掩柴關

六言雜興

三首

失馬詎知非福亡羊不妨補牢病裏正須周易醉中却
要離騷

舉足加劉公腹引手掄孫郎鬚士氣日趨委靡賴有二
君掃除

廣平作梅花賦少陵無海棠詩正自一時偶爾俗人平

地生疑

飲張功父園戲題扇上

寒食清明數日中西園春事又怱怱
梅花自避新桃李
不為高樓一笛風

寄題朱元晦武夷精舍

三首

先生結屋綠巖邊
讀易縣知屢絕編
不用采芝驚世俗
恐人謗道是神僊

蟬蛻巖間果是無
世人妄想可憐渠
有方為子換凡骨

來讀晦菴新著書

山如嵩少三十六水似邛邛九折途我老正須閒處著
白雲一半肯分無

夜讀范至能攬轡錄

公卿有黨排宗澤帷幄無人用岳飛遺老不應知此恨
亦逢蘇節解沾衣

雜感 二首

志士山棲恨不深人知已是負初心不須先說嚴光輩

直自巢由錯到今

百年鼎鼎成何事
寒暑相催即白頭
縱得金丹真不死
摩挲銅狄更添愁

感昔二首

行年三十憶南遊
穩駕滄溟萬斛舟
常記早秋雷雨霽
柁師指點說琉球

馬瘦行遲自一奇
溪山佳處看無遺
酒壚強挽人同醉
散去何曾識是誰

貧甚戲作絕句

貸米東村待不回鉢盂過午未曾開
饑腸雷動尋常事但誤生臺兩鵲來

北齋孤坐破三更庭戶無人有月明
數種袴襦秋未贖羨他鄰巷搗衣聲

糴米歸遲午未炊家人竊閤乃翁饑
不知弄筆東窗下正和淵明乞食詩

宋元詩會卷三十九